



Aqqalu C. Jerimiassen  
Atassut

UKA 2021/33  
20. oktober 2021

**Aatsitassanut inatsisip1 allanngortinneqarnissaanut siunnersuummik UKA2022-mi saqqummiussinissamik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut, taamaalilluni inatsimmi § 1, imm. 2 ima oqaasertalerneqassalluni: “Ingerlatanik inatsimmut ilaasunik suliarinninnermi isumannaallisaaneq, peqqissuseq, avatangiisit, pisuussutinik atorluaaneq kiisalu inuiaqatigiinnut akornutaanngitsumik ingerlatat suliarineqarnissaat kiisalu pissutsini assigiinngitsuni nunat tamat pitsaanerpaamik ileqqorissaartarnerat akuerisaasut qulakkeerneqarnissaat Inatsisartut inatsisaatigut anguniarneqarpoq”. § 83-mi oqaasertaliussa q “nunat tamat ileqqorisartagaat pitsaasut” aamma ”nunat tamat pitsaanerpaamik ileqqorisartagaat, Kalaallit Nunaanni pissutsinut naleqqussagaq”-mut aamma allanngortinneqassaaq. Taamattaq misissueqqaarnissanut qinnuteqaatinik paasisutissamik Naalakkersuisut tamanut saqqummiussisalernissaannik inatsimmi aalajangersagaliisoqassaaq, taamaaliornikkut piffinni innuttaasut soqutigisaqartullu allat, sapinngisamik siusinnerpaamik taamatut suliaqartoqarnissaanik ilisimasaqalersinnaaqqullugit.**

(Inatsisartunut Ilaasortaq Mariane Paviasen, Inuit Ataqtigiit)

Aatsitassarsiorneq, ila taanna oqaaseq tamatta immikkut qanorsuaq oqallisigisinnaagunarparput, taamaattorli isummanik ataatsimilluunniit nikittoqanngitsoq maanngaanniik inersuarmiik anissalluta.

Sunik tamanik sukateriuarsinnaavugut, tamatsinnut pitsaanerusorisatsinnik oqariartuuteqartarnerput piviusunngortinniarlugu.

Maannali aatsitassarsiortoqarpa? Nunatsinni aatsitassarsiorfinnik angisuunik takkutoqarpa?

Akissut ataaseq imannak taaneqarsinnaarpasippoq:

Naamik, ajoraluartumik sinnattoq aatsitassarsiornikkut annertuumik isaatitsisoqalersinnaaneramik sinnattuinnannngorsimavoq kusanartoq piviusunngortinniarnernani sorsuussutaajuartoq, innuttaasunillu avissaartuussutaajuartoq.

Suna periuseq maanna atorniarparput? Suli ungasinnerusumut isigaluta tullissaani alla sukatassarput ujjartussuarput?

Aap, paasisinnaaqaara isumannaattumik ingerlatsisoqartariaqarneramik siunertaqarneq. Taamaattorli immitsinnut allanullu inorsinnaattaarinissaq mianerisariaavoq, uani maanna oqariartuummi naak



paasinaraluartoq suna pineqarnerseq, paasiniarluaqqaarusunnarpoq qanoq maanna ingerlatanut suleriaqqissinnaanermut sunniuteqassanersaq.

Tassami tusartareerparput, ilaatigut allaat aatsitassanut inatsipput nunarsuarmi sukanganerpaatut taaniarneqartartoq.

Taamannak oqartoqartareersimappat suna tassani toqqammaviorpiarnersaq paaserusunnarsinnaavoq.

Nunarpummi ukiuni aggersuni aningaasarsiornikkut sullorujussuaq ornikkaa oqartoqartarpoq, taassumallu matussuserniarnissaanut maanna uagut inuusunnerumaartut nammattuulerumaartussaasunut ilaatigut aatsitassarsiornikkut matussuserneqarsinnaanissaanik neriulluarsagaajuarsimagaluarput. Soorlulusooq aluminiumik aatsitsivimmuttaaq taamannak suliamik torrallaanngilluinnarlutik kinguarsaajuartuarnermikkut naalakkersuisuusarsimasut neriulluarteruorsimagaluartut.

Oqartaaseq Atassummiit una taajuartarparput: “ila pikkorissagaasugununa aporfissiuissalluta? Uffa periarfissarsiuussinermut sammisussaasoq.”

Atassummiit isumaqarpugut, maanna naammareersaq qinngornernik ulorianartunik naalakkersuisooqatigiit 100 ppm-imut killiliiniarnermik suliaqarnerat. Suli sukaterineruniaqqissagutta siunissami aggersumi aatsitassarsiornianit tikeqqikkallarneqarnissarput qularnarsissammat.

Tamannalu pillugu ima ittumik allannguutissamik siunnersuuteqarluta:

*“Aatsitassarsiornermut inatsit maanna atuuttoq allanngortinneqassappat sukaterneqarneroqqilluni pitsaaqutaanik ajoqutaanillu naalakkersuisut nalilersueqqullugit siunnersuut. Siunnersuut inatsisartunut agguanneqassalluni UKA2022, malittaanic suut pitsaaqutaanersut ajoqutaanersullu naammassippata, naalakkersuisut naliliissasut aatsitassarsiornermut inatsisip allannguutissaanic.”*

Taamatut oqaaseqarluta allannguutissatut Atassummiit siunnersuusiarpuit Inuusutissarsiornermut Aatsitassanullu ataatsimiitsitaliamut innersuupparput.